

De Swanenfamilie

En Droom vun'n 01.06.2016

Ee Swanenpoor harr op uns Stück Land an'n Brahmsee glieks blangbi de Boomstöhl, de ik maakt harr, en Nest boot. Dat Poor harr noch twee Kinner vun't Vörjohr dorbi.

Hüüt Morgen weren nu söss junge Swanenküken ut de Eier in't Nest krapen. Uns Hund Hannes weer opreegt un harr sik neven dat Nest sett. Na en Wiel keem he rinlopen, wi harrn jüst fröhstückt, do vertell he uns, dat de Swanenöllern em seggt harrn, de Swanenkinner ut'n Vörjohr müssen nu dat Öllernhuus verlaten.

Nu weer dat Grundstück aver recht towussen un de Kinner kunnen nich to'n Affloog starten. Do see ik to Hannes: „ik fohr de ganze Swanenfamilie mit mien Auto an de Oostsee, wo wi denn all tohoop de Swanenkinner in ehre niege Heimat entlaten warrt.“ Dat funnen all goot, ok de Swanenöllern. Ik klapp de Rücksittbank vun mien Auto daal un Hannes weer as Eerster in'n Kufferruum. De söss Swanenküken hebbt sik twüschen de Vör- un Achterbeen vun em an sien Buuk inkuschelt. Nu keem de Öllern un de beiden Eenjohrigen.

Nadem denn Uschi instegen weer, fohren wi na Swedeneck an de Oostsee. Bi de Fohrt hebbt de beiden Eenjohrigen mit ehre Snabels Hannes an Ohren un Kopp krault.

All tohoop hebbt wi denn noch den Dag an'n Strand tobröcht. Gegen Avend, as dat bilütten düüster wöör, hebbt de Swanenöllern, de söss Swanenküken un ehre eenjohrigen Kinner de Köpp un ehre langen Hälse tosamen staken. Korte Tiet dorna flogen de beiden Eenjohrigen in de „Erwachsenentiet“.
